

VENDIM
Nr. 252, datë 30.4.2014

**PËR FUNKSIONIMIN, TË DREJTAT DHE DETYRAT E KOMISIONIT TË VLERËSIMIT TË
TITUJVE AKADEMIKË**

Në mbështetje të nenit 100 të Kushtetutës dhe të nenit 67 të ligjit nr. 9741, datë 21.5.2007, "Për arsimin e lartë në Republikën e Shqipërisë", të ndryshuar, me propozimin e ministrit të Arsimit dhe Sportit, Këshilli i Ministrave

VENDOSI:

1. Komisioni i Vlerësimit të Titujve Akademikë (KVTA) funksionon si organ kolegjial vendimmarrës, pranë Ministrisë së Arsimit dhe Sportit.

2. Ky komision, në ushtrim të funksioneve dhe të përgjegjësiave të përcaktuara në ligjin nr. 9741, datë 21.5.2007, "Për arsimin e lartë në Republikën e Shqipërisë", të ndryshuar, kryen dhe ka këto detyra e të drejta:

a) Vlerëson dhe merr vendim për propozimet e institucioneve të arsimit të lartë për dhënien e titullit akademik "Profesor". Propozimet dhe vendimet për dhënien e titujve regjistrohen nga sekretariati i KVTA-së në regjistrin e krijuar për këtë qëllim. Procedura e shqyrtimit dhe formati i regjistrimit të titujve akademikë përcaktohen me udhëzim të ministrit të Arsimit dhe Sportit.

b) Kryen njohjen zyrtare në Republikën e Shqipërisë të gradave ose titujve shkencorë, të lëshuar nga institucione të huaja të arsimit të lartë, sipas procedurave të përcaktuara me udhëzim të ministrit të Arsimit dhe Sportit. Kërkesat dhe vendimet për njohjen e titullit regjistrohen nga sekretariati i KVTA-së në regjistrin e krijuar për këtë qëllim. Format i regjistrimit të të dhënave përcaktohet me udhëzim të ministrit të Arsimit dhe Sportit.

c) U bën rekomandime institucioneve të arsimit të lartë për organizimin e studimeve të doktoratës dhe promovimin për titujt akademikë.

ç) Vlerëson, me kërkesë të ministrit të Arsimit dhe Sportit, zbatimin e kriterëve dhe të procedurave për kualifikimin shkencor nga institucionet e arsimit të lartë dhe, kur vëren shkelje të kuadrit ligjor dhe nënligjor, propozon masat përkatëse.

d) Gëzon të drejtën të dërgojë përfaqësuesit e vet për të mbikëqyrur procedurat për mbrojtjen e doktoratave, si dhe për shqyrtimin e titujve akademikë, të cilat zhvillohen nga institucionet e arsimit të lartë në mbledhjet (seancat) e hapura.

KVTA-së mund t'i ngarkohen edhe detyra të tjera për kualifikimin shkencor, në përputhje me ligjin nr. 9741, datë 21.5.2007, "Për arsimin e lartë në Republikën e Shqipërisë", të ndryshuar.

3. KVTA-ja merr vendim me shumicën e anëtarëve të pranishëm në mbledhje.

4. Komisioni mblidhet me njoftim të kryetarit, sipas rendit të ditës, të përcaktuar prej tij.

5. Mbledhjet zhvillohen sipas rregullores, të miratuar nga vetë KVTA-ja.

6. Komisioni i Vlerësimit të Titujve Akademikë (KVTA) përbëhet nga 15 anëtarë, sipas aneksit 1 që i bashkëlidhet këtij vendimi dhe është pjesë përbërëse e tij.

7. Paga e kryetarit dhe e anëtarëve të Komisionit të Vlerësimit të Titujve Akademikë të jetë, përkatësisht, 15 000 (pesëmbëdhjetë mijë) lekë për mbledhje, për kryetarin, dhe nga 13 000 (trembëdhjetë mijë) lekë për mbledhje, për anëtarët. Komisioni i Vlerësimit të Titujve Akademikë mblidhet jo më shumë se 9 (nëntë) herë në vit.

8. Efektet financiare, që rrjedhin nga zbatimi i këtij vendimi, të përballohen nga buxheti i miratuar për Ministrinë e Arsimit dhe Sportit.

9. Vendimet e Këshillit të Ministrave nr. 633, datë 23.5.2008, "Për funksionimin, të drejtat dhe detyrat e Komisionit të Vlerësimit të Titujve Akademikë" dhe nr. 599, datë 31.8.2006, "Për përbërjen e Komisionit të Kualifikimit Shkencor", shfuqizohen.

10. Ngarkohet Ministria e Arsimit dhe Sportit për zbatimin e këtij vendimi.

Ky vendim hyn në fuqi pas botimit në Fletoren Zyrtare.

KRYEMINISTRI
Edi Rama

ANEKSI 1

Komisioni i Vlerësimit të Titujve Akademikë përbëhet nga 15 anëtarë, si më poshtë:

- | | |
|--|----------|
| 1. Ministri i Arsimit dhe Sportit | kryetar; |
| 2. Prof. Gudar Beqiraj, përfaqësues nga Akademia e Shkencave | anëtar; |
| 3. Prof. Dhori Kule, përfaqësues nga Konferenca e Rektorëve | anëtar; |
| 4. Prof. Petrit Malaj | anëtar; |
| 5. Prof. Jorgaq Kaçani | anëtar; |
| 6. Prof. Luljeta Minxhozi | anëtar; |
| 7. Prof. Margarita Qirko | anëtar; |
| 8. Prof. Fatos Harizaj | anëtar; |
| 9. Prof. Anyla Bulo | anëtar; |
| 10. Prof. Klodeta Dibra | anëtar; |
| 11. Prof. Sulo Hadëri | anëtar; |
| 12. Prof. Shezai Rrokaj | anëtar; |
| 13. Prof. Valentina Duka | anëtar; |
| 14. Prof. Aurela Anastasi | anëtar; |
| 15. Prof. Fatmir Hoxha | anëtar. |